



UKA 2017/54

24/10-2017

Justus Hansen

Ilagiinni ilaasortat kisimik akileraartalersillugit ilaqiinnut akileraarummik naapertuuttumik eqqussisoqarsinnaanersoq pillugu apeqquteqaat allaavigalugu oqallinnissamik siunnersuut.

(Inatsisartunut ilaasortaq Randi Vestergaard Evaldsen, Demokraatit)

Matumani siunnersuummi tunngaviusumik pineqarpoq kiffaangissuseq. Qanorluunniit upperisaqarsinnaanissamut kiffaangissuseqarnissaq. Kiffaangissuseqarnissaq allat upperiumasaannut taamaatitsisinnaanissamut.

Nunatsinni qanorluunniit upperisaqarsinnaatitaaneq atuupput aamma kikkut tamarmik qanorluunniit upperisaqarsinnaatitaapput. Tamanna perruaalaarutigissavarput nunarsuummi sinnerani taamaattoqartuaannangilaq. Nunarpassuarni ajoraluartumik inuit malersugaasarput inunnut aalajangiisartunut naleqqiullutik allamik upperisaqarsimagunik. Taamaattoqartariaqangilaq.

Demokraatilli paasinnittaasiat naapertorlugu imatut aqqissuussinikuuvugut, kristumiuunngitsut kristumiunut akiliisartussanngorlugit. Ilagiit Aningaasanut Inatsit aqqutigalugu taamaallaat aningaasalersorneqarmata, taava kikkugaluartulluunniit tamarmik ilagiinnut akiliisnneqartarput. Demokraatit isumaat naapertorlugu tamanna kukkuneruvoq.

Taamaakkaluartorli siunnersuuteqartoq isumaqatigaarput oqarmat ilagiit oqaluttuarisaanitta kulturikkullu kingornussatta ilagigaat angisoorujussuaq. Tamannalu ataqqissavarput naalagiartarutta naalagiartannikkaluaruttaluunniit. Aamma ataqqissavarput ilagiit inunnut ajornartorsiutilinnut annertuumik isumassuisuummata aamma ilagiit tusarnaarnermikkut, ilitsersuisarnermikkut siunnersuisarnermikkullu ikiortagaat amerliartortuarmata.

Taamaattumik ilagiit upperisamut tunngasut saniatigut allanik siunertaqarput aamma. Demokraatini isumaqarpugut siunnersuuteqartup ilagiinni ilaasortat immikkut akileraartalernissaannut isumaa



peqataanillu ilagiit Aningaasanut Inatsit aqquutigalugu annertunngitsunik aningaasanik
pialernissaannut isumaa ataqatigiisitsinerusoq ajunngitsoq.

Taamaalilluta oqaluttuarisaanikkut kulturikkullu kingornussatsinnut ilagiit ilaalluinnarnerat
ataqqissavagut aamma peqataanik periarfissaqalissaagut innuttaasut ilagiinnut
ilaasortaausunngitsut akileraarnikinnerulaartalernissaannut. Innuttaasunut ilagiinnut
ilaaginnarusuttunut ulluinnarni inuuneq akisunerulaalissaaq.

Demokraatini neriutigaarput oqallilluartoqarumaartoq aamma qilanaarpugut partiit allat
isummaminnik saqqummiussinissaannut.